

GARRAIOAK

Zuntz optikori lotzeko beharrak egingo ditue FEVEko Bilbo-Balmaseda linean

Erredakzioa |

Bilbo eta Balmaseda arteko tren lineako geltokiak zuntz optikori lotzeko obrak egingo ditu FEVEk. Halandaze, Espainiako Sustapen Ministerioak enkantera atara dau beharrak egiteko ardura. Bilbon, Gueñesen, Balmasedan eta Zallan egingo ditue lanok, geltokietako barne komunikazino sarea zuntz optikori lotzeko.

Sustapen Ministerioko Azpiegitura eta Garraio Planaren barruan egingo ditue beharrok; 733 mila euroko aurrekontu atala onartu dabe horretarako.

18 milioi lagun, Abandoko Renfeko geltokian

Hortik aparte, 18 milioi lagunek erabili dabe Renfeko Bilbon, Abandon, daukan tren geltokia, 2002. urtean. Holantxe jakin eragin dabe Renfeko arduradunek. Eta generatu dabe 18 milioi horreetatik 14k gertuko trenak erabili dituela. Batenaz beste, 50.000 lagun igaroten dira geltokitik, egunero.

Horrezaz ganera, Kataluniara, Andaluziara eta Galiziara joateko be herritar askok aukeratu dabe Abandoko geltokia. Baina ez hori bakarrik, geltokian izandako lagun-en %15ak ez eban trenik hartu, geltokian bertan dagoen Vialia merkataritza guneko zerbitzuak erabili zituen: 2.500.000 lagunek, hain zuzen. Aurton sei urte bete ditu Vialiak, eta kalidadeko ziurtagiri bi jaso ditu: ISO 9002, alde batetik, eta ISO 14001, bestetik.

Ganera, Bilboko uriguan egoteak eta metroko Abandoko geltokirako sarbidea izateak be lagundu dauela onartu dabe Renfeko arduradunek, prentsa ohar baten bidez.

Durangaldeko euskerazko komunikabide batek marketing arduraduna eta komertziala behar ditu. Bialdu curriculumak lehenbailehen **79 postakutxara** **48200 DURANGO**

ALDUNDIA. Batzar Nagusietan aurkeztu dau Gobernu Taldeak aurrekontu proiektua

PP eta PSE negoziatetako prest dagozala uste dau EAJ eta EAren taldeak

Hauteskondeek sortutako giroa ez dala trabea izango esan dau BBNNetako lehendakariak

Irene Berro |

2003. urterako Bizkaiko Foru Aldundirako aurrekontu proiektua aurkeztu eban atzo Javier Urizarbarrena Ogasun diputauak Batzar Nagusietan. Danetara, 4.893 milioi euroko aurrekontu proiektua proposau dabe foru agintariet. Igazko aurrekontua oinarri hartuta, %7,4 igon dabe. Eta asteen hasiko ditue Batzar Nagusietako alderdiekin alkarrizketak, aurrekontuak onartzeko babesa lortzeko.

Batzar Nagusietako lehendakari Aitor Estebanek esan eban, «aurkeztutako aurrekontuak egokiak dira Bizkaiko garapenerako, eta hauteskondeak hurren badagoz be, alderdi politikoek euren interesak alde batera iztea itxaroten dogu eta Bizkaia merezi dituan aurrekontuak onartzea».

Bide horretan asteen egingo dabe berba Batzar Nagusietako alderdiekin. Era berean, sail guztietako diputauak Batzar Nagusietako batzordeekin batuko dira, sail bakoitzerako zehaztutako aurrekontu atalaren ganean azalpenak emoteko. Emendakinen sasoia izango da ondoren, eta foru agintariet generako alderdien babesa jaso ezker, martiaren amaieran onartuko litukie aurrekontuak. Hauteskondeak dirala eta, martiaren 31n desegiten dira Batzar Nagusiak.

Urizarbarrena eta Esteban baikor agertu ziran aurkeztutako aurrekontuekin. Halan eta guzti be, maiatzeko hauteskondeak tartean dirala, PP eta PSE-EE alderdien babesa lortzeko



MARISOL RAMIREZ / ARGAZKI PRESS

Aitor Esteban eta Javier Urizarbarrena komunikabideen aurrean egindako agerraldian, Bilbon.

foru agintariet gatx eukiko dabela emoten dau.

Udaletarako diru kopuru bera

Aurkeztutako aurrekontu proiektuaren arabera, Bizkaiko udalek 2002. urtean jaso eben diru atal bera jasoko dabe: 486 milioi euro, hain zuzen. Foru agintariet ez dabe beharra ikusi udalei bideratutako atala igoteko.

Urizarbarrenak azalduetakoaren arabera, Gizartekintza eta Herri Lan eta Garraio sailek

INBERTSINOAK

Herri lanetarako diru atala handitu gura dabe, Triano golf zelairako eta hegoaldeko saihesbiderako

jaso ditue aurrekontu atalik handienak: 247 mila euro eta 238 mila euro, hurrenez hurren. «Elbarrituen beharriarenak, gizarte soldata eta gizarte babesa behar daben herritarrek

aintzat hartu doguz, eta %11,8 igon dogu 2003. urterako aurrekontu atala». Herri Lan eta Garraio Sailerako eta Ingurumen Sailerako atalak be igon egin ditue. Besteak beste, hegoaldeko saihesbidea egiteko, Triano mendian golf zelaia egiteko eta Boroako zentral termikoa egiteko urbanizazino lanak pagetako.

Batzar Nagusietarako diru atala be igon dabe, Gernikako Juntetxea eta Gerediagako baseliza konpontzeko.

BILBO. Etnologoen IX. Kongresua, eta Gastronomia eta Ardao Erakusketea egingo ditue, besteak beste

Ardaoa izango da nagusi datozen egunotan, Guggenheim museoan

Erredakzioa |

Ardaoa izango da nagusi Bilbo uriko Guggenheim museoan, datorren zapatutik astelehenera bitartean. Izan be, Etnologoen IX. Kongresua ospatzeagaz batera, *Bilbovinos* izeneko Ardaoaren III. Areto Profesionala eta *Kalean Jan* Gastronomia eta

Ardao Erakusketea ipiniko ditue museoan bertan eta inguruan, Abandoibarran. Bizkaiko Foru Aldundiak sustatu ditu ekimenok.

Etnologoen FEAE federazioak gertetan dau kongresua urtero, eta ohiturea danek, etnologoen hamaika alkartek hartuko dabe parte aurtongo

ekitaldian be. Ardaoaren alorreko azken barrikuntzen ganean jardungo dabe, batetik, eta Bizkaiko txakolina eta Arabako ardaoa aurkeztuko deusiez kongresuan batutako etnologoek, bestetik.

Ardaoa erosteko, Bilbovinos

Ardaoa erosteko aukerea eukiko dabe etnologoek zein bertara joaten diran herritar guztiek Bilbovinos aretoan. Hortik aparte, ardaoa egiteko azken joerak jakin eragingo ditue.

Eta azalpenak jasoteaz gane-

ra, ardaoa probau gura dabenek *Kalean Jan* erakusketara jo beharko dabe. 1.000 metro koadroko karpea ipiniko dabe Abandoibarran; pintxoak eta ardaoa probetako emongo ditue euro biren truke. Zapatuan zabalduko dabe karpea eta hiru egunez —astelehena izango da azkena— egongo da berton zer jan eta zer edan.

Goizeko hamaiketan edegiko dabe, eta arrastiko laueta, zarratu. Iluntzeko zazpietan, dana dala, barriro zabalduko dabe gaueko hamaikak arte.